

KOLOSI

KOLOSIMBA LA NIMBAKAT POL PHLIWUTA PAS

¹ Wun Pol wun. Wunayi pas piliwukna. Wun Kraist Jisasna nyaangit yiga mbutiga nyan wun. Wun aposel wun. God wandi mala aposelat tiwun. Timoti wunogwinala tindi maa wan pas piliwutiwun. ² Ngwuk Kolosi walinja ngepmamba liga Godna mbaapma nimba ngwuk kat kan pas piliwutiwun. Kraist kat yelavika lingwan wuna kita mbaapma nimba ngwuk. Nina nyaek God ngwuk kat awagapma kwilinda vat kalangwan-gat wowun. Wan vak klalaa apma maawutno lingwangat wowun.

GOD KOLOSIMBA LA NIMBA KAT APMA MAAWUT KWINDI

³ Nina njambwi nyan Jisas Kraistna nyaek God kat ngambuliya njimbla ndi kat walili. Kolosimba liga nimba kat apma vat yimin waa walili. Ndi kat sivu kilili. Kan yilingwa vak kat wutaa sivu kilili. ⁴ Jisas Kraist kat ngwutna maawupmba yelavika nimamba kwutaa ligangwuk. Godna mbaapma nimba kat kwunaka nimamba woviyaguga ligangwuk. Wan vak yingwa vak tamba wukna. ⁵ Wan apma nyaangit savagu liga nyaangit wukngwa njimbla, njimbla njimbla apma vat yetingweya vatna nyaangit wukngwuk. Wan apma vat klangweya vat God ngwuk kat nyinangwupmba taagandi, ligandi. Wan nda ana siliwokiyandi. Wan klangweya nda kat yelavika Jisas Kraist kat kwutaa liga

nat nimba kat kwunaka woviyaguga ligangwuk. ⁶ God ngwuk kat awagapma kwunatnda vak kat wutaa maawupmba yelavika kwutaa apma vat yetingwuk. Apma maawupmba yelavika kwutaa yetindi. Wan vak tak ngwuk kat tindi. Mbambala wun kipmana ngepma ngepma wan vak tigandi. ⁷ Tat wan apma nyaangit Epafra mbutndi, wukngwuk. Epafra Kraistna njivwa kwutiga nyana. Anogwinonala kitamba njivwa kwutiga nyana. Angat walaa njivwa kwutigandi. ⁸ Epafra ngwuk kat vilaa angat yalaa mbutndi. Wupma wandi. Godna waagan Kolosimba liga nimba kat apma maawut kwindi, nat nimba kat nima maawut yelavika kwunaka ligandi waa angat wandi. ⁹ Wan nyaangit wutaa ngwuk kat God kat ngambuligali. Godna maawupmba yetingweya vak nimamba wukwangat waa. Godna waagan savagu yelavika liga maawut ngwuk kat kwindangat wali. ¹⁰ Wan apma vat klalaa njambwi nyan waa nyaangipmba yetigiyangwuk. Kwutingweya njivwa kat vilaa njambwi nyan woviyaguga ligiyandi. Aywaa kwovak apma njivwa kwuka yetigiyangwuk. Ngwutna maawut Godnat savaguyelavika linda vat niman yigiyandi. ¹¹ Godnanamba liga kwondu nima ngleia. An God kat ndina kwondu ngwuk kat kwindangat wali. Wan kwondu klalaa ngwula lak kavle vat yandeyan wan kavle vat ngwuk kat ana kwulakiyandi. Apma vat tagula vat tigiyangwuk. ¹² Ngwuk nina nyaek God kat solat siga sivu agi ngwula. God nin kat kwunatndi maa ndina apma kava wuleilaa ndina nimba kat kwindeya apma nda klaiganin. Nin kat kwunatapman

yindeyanwan apma nda ana alipsiɓa klaiganin. ¹³Tat nin kulun wala kavamba yeti vla kavle savle yetinin. Wan kavle vat nin kat viɓa lindi. God ndina apma nyan yeta vat nin kat kwindi maa ndina nyan nin kat viɓa ligandi. ¹⁴Jisas nin kat tiga Godna kimbut maawut kwunapmak ndi kat wenga kwindi. Ngi kat tiga God nin kat ana kavle yigiyandi.

KRAISTNA VAT

¹⁵God kat kita nyan ana vindi. Kraist kat mina vindi. Godna angwa vat yetinda vak simogwivat yandi. Ndi Kraist ndi tat ta nyan. God kwukna nda aywaa ndina kwupmba liga ndi. ¹⁶God wandi maa ndi aywaa kwutndi. Kipmamba liga nda nyinangwupmba liga nda ndi Kraist aywaa kwutndi. Viɓa yetina nda vilapman yetia nda ndi Kraist aywaa kwutndi. Waagan vla liga nda ndi Kraist aywaa kwutndi. God wandi maa Kraist aywaa kwutndi. Kraistna si kwusonjangat ndi God wandi, kwutndi. ¹⁷Ndi Kraist tamba la nyana. Mbambala liga nda Kraistna kwondumba ligandi. ¹⁸Ndi ndinagwi liga nimbana njambwi nyana. Ndina mbaapma kat njambwi liga nyana. Ndina mbaapmamba liga nimba ndina kwondumba yetiligandi. Ndi Godna tata liga nyan. Kiyalaa liga laakiyaa nimba kat tata liga nyana. Ndinyangu aywaa nina njambwi nyan timbandi walaa God ndi kat wandi, kiyalaa laatndi. ¹⁹God ndina maawupmba wandi. Wuna maawut klalaa wunai liga vla ligiyamin wandi ndina nyan kat. ²⁰Tamba la nda nyinangwutna nda kipmana nda Godna nda mina lindi. Kavle vat yandi maa God

waa viga linda nda kat kai waa kwagalandi. Wan kavle vat ya nda kat tiga God ndina nyan kat wandi mala kipmat yandi. Wan nda kat wumba yambi ndina lak kiyalaa God kat kwivat yandi. God ndinai kwukna nda ndi kat maama nimba vla lindi. Kraist Godna nyan ndi kat kimbik kwupmat diwai krosmba kiyandi. Kiyalaa kimbik kwutndi. Kipmamba liga nda nyinangwupmba liga nda kat ndina lak kiyalaa wumba yambi God kat kwindi.

²¹ Tamba God kat sivlamba li la nimba ngwuk. Ngwuk kavle vak yiga yetilingwuk. Ngwuk kavle maawut yelavika lingwuk. Ngi kat tiga ngwuk Godna nimingi vla lingwuk. ²² Mbambala Godna nyan nina mbangi nyana tiga kiyalaa Godnogwi kipma liga nimba kat kimbik kwutndi. Mbambala Godna ali nimba ngwuk. Ngini Godna nyan ngwuk kat kwutaa Godna mindama sambimba kalindi, tigiayangwuk. Apma vat mina yetiligiyangwuk. Kavle nimba waa ana waigandi. ²³ Wan apma vat klavat wangweyan kwutaa lingwa apma nyaangit ke kwagalangweya. Ngwuk aywaa wan kwutaa yetingwa apma vat tagula vat kwutaa ligiyangwuk. Mandip maawut ke klangweya. Tak wan apma nyaangit wutaa wan nyaangit nin kat kwunakiyandi waa yelavika yetingwuk. Wan vak kat ke kwagalangweya. Wan apma nyaangit ngepma ngepma liga nimba kat mbutuwa nyaangitna. Wan mbutuwa vat wuna njivwa. Wan apma nyaangit ngepma ngepmamba liga nimba kat mbutindi.

POL KWUTA NJIVWA

²⁴ Wan mbutuwa nyaangit ngepma ngepmana nimba kat yiga mbutiwun. Wan njivwakat nima sakwat nimba kai walaa wun kat waleaga viyavat tiligandi. Wan vak kat ana vaaka ligowun. Wuna mbangi wiyo laagandi, ligowun. Kraist kat ndino ndina mbangi nimamba viyandi kangit yilindi, lindi. Wan kavle vat ndina mbaapmamba la nimba kat tika klandi. Wuno ndinai yeta vapmba yetivat tigowun ngwuk kat tiga. Godna njivwa kwutiga nimba kat aywaa nat nimba kavle vat yigiyandi. Ngini yaigaa nandinya wan val ngiligiyandi. ²⁵ God wandi, ndina mbaapma nimba kat njivwa kwuka ngwuk kat kwunapmak yiwun. God wandi, ndina apma nyaangit aywaa ngwuk kat kwunapmat mbutigowun. ²⁶ Wan nyaangitnana nat nyaangit kita pagwula lindi. Tamba la nimba ana viga wuka lindi. Mbambala wan nyaangit ana pagwugandi. God ndina nimba kat aywaa simogwiga mbutndi. ²⁷ God wan pagwuga la nyaangit ndinyangu kat aywaa simogwiga mbupmat waligandi. Wan nyaangit apma nyaangitna. Tagula vat tiga nyaangitna. Wan nyaangit aywaa ndi kambu nimbana nyaangitna. Wan nyaangit kupma liga nyaangitna. Kraist ndi ngwula maawupmba yetiligandi. Tiga liga ngini Kraist kat God apma vat yinda vat ngwulo ngwuk kat wupma apma vat yigiyandi. ²⁸ Kan Kraistna nyaangit kambu nimba kat kwunapmakat mbutina nyaangitna. Apma vat yelavika ndi kat mbutiganin. Wan kavle vat ke yiga wan apma nyaangit kwutaa ali ngwula waa ndi kat mbutiganin. Kraistnonala kita vat apma vat timbandi walaa ndi kat mbutiganin. Ngi kat

tiga God ndi kat vilaa waigandi. Ngwuk tamba maawut sika ligangwuk waa waigandi. ²⁹ Ndi kat mbupmat ana samat njivwa kwutigowun. Nima njivwamba kwuka liligowun. Ndi Kraist kwiya kwondumba kwutigowun. Wan kwondu wunamba liga wunkat ava kwiligandid waa kwukweya njivwa kat.

2

¹ Ngwuk kat kwunapmak kat nima njivwa kwutiwun. Kwutuwa vat vingwangat wowun. Ngwutna kapma kai. Leodisia walinja ngepmamba liga nimba kat ndino ndi kat nima njivwa kwutiwun. Nima sakwat Godna mbaapma nimba ndina mindama vilapman yuwa nimba ndi kat kwunapmak njivwa kwutiwun. ² Tagula maawutno timbangwuk walaa ngwuk kat njivwa kwutigowun. Awat sowat woviyaguga liga kita vapmba yetimba ngwuk walaa ndi kat njivwakwutigowun. God waa nyaangitna tat pagwula la nyaangik kat wutaa maawupmba yelavika yetingweya vat maawut sika ana yetigiyangwuk. Wan tat pagwula la nyaangit Kraist ya vat ta nyaangitna. ³ God nin kat apma maawut kwindeya vatna angwa Kraist. Nat nyan kai.

⁴ Kita nyan kavle vak kat ngwukapmba woseka wandi maa ngwutna maawut kavle yilandi. Ndi kat tiga wan nyaangit ngwuk kat tamba mbukwun. ⁵ Mbambala ngwulogwinala ana ligowun. Sivlamba liga ngwuk kat nima vat yelavika ligowun. Kraist kat nima vat

maawupmba kwutaa lingwa vat vilaa ngwuk kat woviyaguga ligowun.

KRAIST JISASAGWINALA KITA VAT YETI NGWULA

⁶ Ngwuk kupma wangwuk. Kraist Jisas nina njambwi nyana waa wangwuk. Ngi kat tiga ndinogwinala kita vat yeti ngwula. ⁷ Ngwuk mi vla ligangwuk. Kraist kipma vla ligandi. Ngwutna njingwut nima ngleimba ndaiga wungi kipmamba kwukandi. Kraist kat yelavika ali ngwula. Nat nimbananamba wutaa ndi kat yelavika ngwula maawupmba kwutaa lingwa vat nimamba yelavika ali ngwula. God ngwuk kat apma vat yindi. Ngi kat tiga ndi kat sivul kiga yeti ngwula.

⁸ Kita nyan ngwuk kat yalaa wun apma maawutno ligowun waa walandi. Ngwuk kat woseka nyaangit walandi. Wan kavle nyaangit ndinyangu kat mbutseli mbutseli mbutinja nyaangitna. Wan Kipmana nyaangitna. Kraist wa nyaangit ana ndi. Ngwuk avimba ngwuk wan kavle vat yalandi.

⁹ Ngwuk kapma vat tiga ngwuk. Ngwuk Kraistna nimba ngwuk. Kraist kipma liga nimbana mbangi klalaa ndina maawut ana klandi. God ndi kat maawut kwindi maa God yeta vapmba yetindi. ¹⁰ Kraistnogwinala kita vat yetingweyan wan apma vat aywaa tamba klangwuk. Kraist ndi kipmana waagan vla liga ndana njambwi nyana. ¹¹ Kraistnogwinala kita vat yetingweyan kavle vak kat kai wavat mbangi pitinja vak tamba klangwuk. Ndinyangu

mbangi pitinja vak kat ana wowun. Wungi pitinja vla Kraist ngwuk kat kwutaa tamba yetingwa kavle maawut kat limbwindi. Mbambala tamba yetingwa kavle maawut ngwuk kat ana viga ligandi. ¹² Wan ngu yagulingwa njimbla Kraist kiyandi, waangumba ndi kat taaganja vak vla wupma ngwuk kat ngumba yagulindfi. God kwondu kwindi maa Kraist kiyalaa laatndi. Gwutno wupma God kwuta njivwa kat ngwutna maawut yelavika kwutaa lingwan Kraist waangumba liga laatnda vla tamba laakngwuk. Laataa kupi maawupmba yetigangwuk. ¹³ Ngwuk tamba kavle vapmba yetiga ngwutna maawut God waa nyaangit ana yelavika lingwuk. Kiyaa nimba vla lingwuk. Judana lo ana viga lingwuk. Mbambala God wandi, Kraist laatnda vla laakngwuk. Laataa apma kupi maawut yelavika yetingwuk. Kavle vat yetingwa vak God tamba silimbwindi. ¹⁴ Tak Godna lo kalitaa savagu ana yetingwuk. Wan lo kalikngwa vak tamba siga naguga piliwutndi. Wan piliwutnja nyaangit God kwutaa silimbwindi. Wan nyaangit diwai krosmba God kaalandi. Jisasnogwinala wan nyaangit kita kita tamba kiyandi. ¹⁵ Kraist kiwai krosmba kiyalaa wan kipmana waagan vla liga nda kat kwulatndi. Ndina nambu kalitaa kwutaa kiyandi. Aywaa viga wandi. Min ndi kat tamba kwulapmin waa viga wandi. ¹⁶ Kraist wan kipmamba la njambiya kat kwulatndi. Ngi kat tiga nat nimba ngwuk kat njambiya laaganjeya vak ke wuka. Kigindana njambiya, nguna njambiya, nandinyana njambiya, pestona njambiya, sila vili wan nandinyana njambiya, ngwuk kat

laaganjeya vat ke wuka. ¹⁷ Wan kipmamba la njambiva mi kait vla ligandi. Njambiyana nagwa Kraistna. Tamba la nimba Kraist ngini kwutndeya njivwa kat yelavita mi kait kwutnja vak vla njambiya taagandi kipmamba. Mbambala Kraist yandi maa ndi kat maawupmba yelavika kwutaa ligandin. ¹⁸ Nima sakwat nimba ngwuk kat yalaa waigandi. Nin simapmba vilaa apma nambu klanin. Nin kiginda kat kai walaa yetiliganin. Ensel kat nin kwunatiganin. Nin njambwi nimba nin. Ngwuk mat nyangu vla ligangwuk. Ngwuk kavle vapmba yetiligangwuk waa waigandi. Ngwuk kat kai walinja vak kat ngwuk ke yelavikngwa. Wundi nimba kavle maawupmba yelavita nin nima nimba nin waa woseka waligandi. ¹⁹ Wundi nimba Kraist kat maawupmba yelavika ana kwutaa ligandi. Kraist njambwi nyanat tinda vat ana viga ligandi. Nin wungi vat kai. Kraist njambwi nyanat tiga nin ndina mbaapma nimba ndinai waa nyaangipmba kita vapmba yetigiyandin. Apma vat yetineya vat niman yigiyandi.

KRAISTNOGWINALA KITA VAT KIYALAA TIGA LAATNIN

²⁰ Kraistnogwinala kita vat kiyangwuk maa wan kipmana njambiya ana ngwuk kat kwutaa viga ligandi. Kipmana njambiya kat mina kwutaa yetiligan nimba kat manda kat ndina kwupmba yiligangwuk. ²¹ Manda kat wan njambiya kwutaa yetiligangwuk. Wan nda ke kwuka walinja njambiya. Wan da ke kiga walinja njambiya. Wan da ke sinyika walinja njambiya. Manda kat wan njambiya kwutaa yetiligangwuk. ²² Kai walinja

nda njimbla njimbla liliga nda ana ndi. Wan kipmamba liga nda. Wan njambiya ndu nyan taaga njambiya. Ndu nyan mbutika nyaangitna. ²³ Nima sakwat nimba wan njambiya kat apma vatna waa yelavitigandi. Ensel kat kwunatneyan apma vatna waa yelavitigandi. Kiginda kat kai waneyan apma vatna waa yelavitigandi. Nina mbangi kat kavle vat yineyan apma vatna waa yelavitigandi. Wan vat apma vat ana ndi. Wan vak tamba yelavika yetinja maawuk kat ana kwunatigandi.

3

GOD WANDI MAA KRAIST LAATNDA VLA LAATNIN

¹ Ngwuk wupma ana yetigangwuk. Ngwuk Kraist kiyalaa laakna vak vla kiyalaa laakngwuk. Wan kipmana vak kat mina ke yelavika yetiga. Ngwuk nyinangwupmba liga nda kat mina yelavika yeti ngwula. Wan kava Kraist Godna yaagindan naangamba ndaaligandi. ² Wan kipmana nda mina klavat ke yelavika yetingwa. Ngwuk nyinangwutna nda klavak kat yelavikiyangwuk. ³ Wan kipmana nda mina yelavitingwa maawut ndi tamba ngilindi. Mbambala Godnagwi Kraistonala kita vat kupi maawupmba yetigangwuk. Tiga liga wan tamba la kavle vat ngwuk kat ana kwulakiyandi. ⁴ Kita vat yetilina nyan Kraist yandi mala kita vat yetigiyanin. Apma vat yetinda vak klalaa yetinda vla yetigiyanin. ⁵ Ngwutna maawupmba liga vat wan kipmana vapmba yeti ngwula waa waliga vak kat vatnya ngwula. Kingi kavle vak kat kai waa waligowun. Yambisik yiga

yetinja vak, kavle vak yetivak kat walinja vak, sikwuka yetilinja vak, nat nimbana nima sakwat nda kat klavak kat woviyaguga yetilinja vak. Nat nimbana nda kat klavak kat yelavatinja vak waagan kwunatinja vak vla ligandi. Kavle vak mbit. ⁶ Wan kavle vapmba yetiliga nimba kat God kimbut yiga ndi kat sigiyandi. Ndinai waa nyaangit wupmak kat kai waligandi. ⁷ Ngwutno tak wungi vat kavle vat yilingwuk. Tak wungi vat kavle vat ngwuk kat kwutaa viga lindi.

⁸ Wan vak mbambala aywaa kwagala ngwula. Nat nyan kat njika nat nyan kat kimbut yiga ke yetiga. Nat nyan kat kavle vat yiga ndina si kat ke viyesandaga. Kavle nyaangit ke mbuka.

⁹ Nat nimba kat ngwutna maawupmba ke woseka waa. Wan tamba yelavika yetingwa maawut tamba kwagalangwuk. Tambana maawut wala vapmba manda kat yetigiyangwuk.

¹⁰ Mbambala kupi maawut klalaa mandip vapmba yetigiyangwuk. Wan kupi maawut God kwukna maawutna. Nandinya nandinya kwunatigandi wungi kupi maawuk kat. God ndinai yeta vapmba yetingwangat ngwutna kupi maawut kwunatigandi. Wungi kupi maawupmba God kat yelavika yetingwangat kwunatigandi.

¹¹ Kraistnonala kita mbaapmamba kita vat tiganin. Juda ana ndi Juda ndi waa ana kapma kapma kalikiyandi. Mbangi pitnja nimba ndi mbangi pitapman nimba ndi waa ana kapma kapma kalikiyandi. Nambu liga nimba ndi nambu lapman tiga nimba ndi wa ana kapma kapma kalikiyandi. Njivwa kwutaa nimba ndi kwo nat nimba kat viga la nimba ndi waa ana

kapma kapma kalikiyandi. Kraistnonala nin aywaa kita vat tiganin. Wan mbaapma nimbana maawupmba aywaa ndina maawupmba Kraist yetiligandi.

NAT NIMBA KAT APMA VAT YETINA VAT

¹²⁻¹³ Ngwuk aywaa Godna apma nimba ngwuk. Ngwuk kat woviyaguga liga ngwuk aywaa wuna nimbat tigiyanngwuk waa wandi God. Yagwa ngwula aywaa waa wandi God. Ngivak kat tiga nat nimba kat yelavika apma vat ay ngwula. Nat nyan ngwuk kat njitndeyan awat ke ndi kat njika. Njitnda vak kat ke yelavikngweya. Njambwi nayan kat njikngwa vat yelavitapman yinda vak vla nat nimba kat ke yelavikngwa. ¹⁴ Wundi apma vapmba yetiga ngwuk awat sowat woviyaguga ali ngwula. Nat nimba kat woviyaguga lingweyan wan apma vatna angwa vatna. ¹⁵⁻¹⁶ Kraist ngwutna maawupmba taaganda apma vapmba yeti ngwula. Wan apma vapmba yetingwangat wuna mbaapmat aywaa yagwa ngwula waa wandi God. Tiga liga ngwutna maawupmba tigandi. Wan apma nyaangit awat sowat yigumba mbuka visimogwiga apma vat ali ngwula. Godna si kwusoga God waa nyaangit tiga mbangu kwundi waga ali ngwula. God kat sivu kiga mbangu kwundi waga ali ngwula. ¹⁷ Kwutingwa njivwa aywaa njambwi nyan Jisasna simba agwuk ngwula. Walingwa nyaangit aywaa ndina simba waga awa ngwula. Jisasna simba waga nina nyaek God kat sivu agi ngwula.

DU, TAAGWA, NYANGUNA NYAANGIT

¹⁸ Ngwuk taagwa ngwutna lana kwupmba liga ndina kwundi wuka yeti ngwula. God wungi vak kat woviyaguga ligandi. ¹⁹ Ngwut ndu ngwutna taagwa kat yigumba kwunaka nima maawut yelavika ali ngwula. Ndi kat ke nima vat yiga njika.

²⁰ Ngwut mat nyangu nyaek nyimena kwundi wuka yeti ngwula. God wungi vak kat woviyaguga ligandi. ²¹ Ngwuk nyaek nyime siva siva nyangu kat nima vat yingweyan ndina maawut kavle yiga tipmwigwula yigiyandi.

NJIVWA KWUTA NIMBO NAT NJIVWA KAT VIGA LA NYANA NYAANGIT

²² Ngwuk kontrakna nimba ngwutna njambwi nyana kwundimba wuka njivwa agwuk ngwula. Ngwuk kat yiga vindexa njimbla mina ndina kwundimba njivwa kwukngweyan ana nglaatndi. Njimbali njimbla ndina kwundi wuka yigumba ali ngwula. God njimbla njimbla ninai kwutaa njivwa viga ligandi waa yelavik ngwula. Ngi vak kat tiga apma vat njivwa kwukiyanin. ²³ Kwutingweya njivwa aywaa nimbamba agwuk ngwula. maawupmba yelavik ngwula. Wan kwutuwa njivwa ndinyangu kat ana kwutigowun. God kat kwutigowun waa yelavik ngwula. ²⁴ God ngwuk kat wenga kwigiyandi. Ndina nyangu kat kwivat taakanda nda ngwuk kat kwiga tigandi. kwutingwa njivwana njambwi nyan ndu nyan ana ndi. Njambwi nyan Kraistna. ²⁵ Kita nyan kavle njivwa kwutndeyan God ndi kat kavle wenga kwigiyandi. God nat ana woseka waiganin.

4

¹ Ngwuk njivwa kat viga la njambwi nimba ngwuk ngwutna njivwa kwutiga nimba kat apma wenga kwiga apma nyaangit ambuk. Ngwuk wupma yelavipmba ngwuk. Wuna njambwi nyan nyinangwupmba ligandi waa yelavik ngwula.

KOLOSIMBALIGA NIMBA KWUTNJEYANNJIVWA KAT POL MBUTA NYAANGIT

² God kat ngambuvak kat ngwutna mbangi wana kilipmbangi walingweya. Njimbla njimbla awamba. God kat ngambungweya njimbla ndi kat sivu agimba ngwuk. ³ God kat wagalangweya njimbla God kat wagalamba ngwuk wun kat. God kat wagalangwuk wun kat viga lindi, mbukweya apma nyaangit ndina waamba wupmbandi. Kraist ndinyangu kat kwunatinda va kat mbupmat wowun. Mbukwangat wun kat kalabusmba taagandi, tigowun. ⁴ God kat wagalangwuk mala wuna kwundi apma vat tindi mala mbukwa nyaangit wutaa maawupmba yelavikiyandi. Nyaangit ngambuvat wuna njivwa. Kavle vak ngambuvak kat kai waligowun.

⁵ Nat nimba Kraistna mbaapma nimba naa ndi. Ndinogwinala yetingweya njimbla yigumba yetimbangwuk. Ndinogwinala yetingweya njimbla ndi kat wan apma nyaangit ambupmba ngwuk. Kwo wana yetilingweya. ⁶ Ndi kat mbukweya njimbla ngwula mbangi wiyo waavi laagandi, apma maawut sika mbukiyangwuk. Ndi kita kita yelavika linjeya maawuk kat vilaa ngwuk kat waganjeya nyaangit wutaa ndi kat wan apma nyaangit ambuk ngwula.

NGINI LA NYAANGIT

⁷ Ana kita mbaapma nyan Tikikas ngwula ngepma yilaa ngwuk kat anai yetiga kwutiga njivwa ngwuk kat mbukiyandi. Anogwinala liga wan nyan njambwi nyana njivwa yigumba kwutndi. ⁸ Kan kwutingwa njivwa kat vilaa ngwuk kat mbuka ngwutna maawut kwunakiyandi. Ngi kat tiga ndi kat wowun maa ngwutna lak yigiyandi. ⁹ Kita nyan Onisimas ndinogwinala yigiyandi. Ndi ngwutna ngepma nyana. Ninogwinala apma vat tiga kita mbaapma nyana. Wan ngepmamba yina vak ngwuk kat mbukiyambit. ¹⁰ Wunogwinala kita vat kalabuimba la nyan Aristakas ngwuk kat apma nandinya waligandi. Makno ndino wupma ngwuk kat apma nandinya waligandi. Wan nyan Banabasna swamba. Ngwuk kat tamba mbukwun wan nyan Mak kat. Ngwuk kat yindeyan ndi kat apma nandinya waa ndi kat yagwa waa awamba ngwuk. ¹¹ Jisas waa Jastas walinja nyan ngwuk kat ndino apma nandinya waligandi. Wundi kuvuk nyangu Aristakas, Mak, Jastas tat ndi Juda ndi. Mbambala Kraistna mbaapmamba yalaa Godna nyaangit wunogwinala mbutigandi. Wunogwinala liga nat nima sakwat Juda walinja nimba kai. Kuvuk nyangu mina lindi. Wun kat nima sakwat njivwa kwuka wun kat kwunapmat tigandi.

¹² Ngwula ngepmana nat nyan Epafras ngwuk kat apma nandinya waligandi. Ndi Kraist Jisasna njivwa kwutiga nyana. Nima sakwat njimbla God kat nimamba wagalaligandi ngwuk kat kwunatndangat. Apma maawut yelavika God kat kwu-

taa lingwangat God kat wagalaligandi. Mandit maawupmba mbaak yelavitandi walaa ngwuk kat God kat wagalaligandi. God waa nyaangipmba yetimba ngwuk walaa wagalaligandi. ¹³ Ngwuk kat kwunapmak kwutinda nima sakwat njivwa tamba viwun. Ngwuk kat mina ana wan njivwa kwutigandi. Leodisia walinja ngepma Hirapolis walinja ngepmamba liga nimba kat waa njivwa kwutigandi. ¹⁴ Nina apma dokta vla liga ndi Luk ngwuk kat apma nandinya waligandi. Dimas ndino ngwuk kat apma nandinya waligandi.

¹⁵ Leodisia walija ngepmamba liga kita mbaapma nimba ndi kat apma nandinya waweya nyaangit ambuk ngwula. Nimpa walinja taagwa li kat apma nandinya waweya vak ambupmba ngwuk. Lila ngaymba yisolaa la nimba kat ndino ndi kat mbukiyangwuk. ¹⁶ Kan pas vilaa Leodisiamba liga kita mbaapma nimba kat agwimba ngwuk. Ndino vigandi. Ndino Leodisiamba liga nimba ngwuk kat ndina pas kwindi mala avimba ngwuk. ¹⁷ Ngwuk Akipas kat ambupmba ngwuk. Nima nyana njivwa min kat wawa njivwa aywaa agwupmba min waa ndi kat ambuk.

¹⁸ Wan pasmba tat ta nyaangit wowun maa piliwuta nyananamba pensil klalaa wan ngini la nyaangit wuna taambamba piliwukwun. Ngwuk kat apma nandinya waa piliwutigowun. Kalabusmba liwun. Wun kat ke maawut siliwoka. God ngwuk kat awagapma kwunatndangat wowun. Ngiyambak.

GOD WAA NYAAGIT
The New Testament in the Iatmul Language of Papua
New Guinea
Nupela Testamen long tokples Iatmul long Niugini

Copyright © 1975 Bible Society of Papua New Guinea

Language: Ngepma Kwundi (Iatmul)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-12-13

PDF generated using Haiola and XeLaTeX on 21 Feb 2024 from source files dated 31 Aug 2023

b9b92e46-2e7b-584e-a145-60c7cfcc1e68